



53 pelajar tingkat kemahiran berbahasa Inggeris

Oleh: FATIN

Seramai 53 pelajar Universiti Malaysia Pahang (UMP) berpeluang menggunakan cuti semester universiti kali ini bagi membina keyakinan diri berkomunikasi dalam bahasa Inggeris dengan mengikuti Kem *Wonderful World of English* anjuran Pusat Bahasa Moden & Sains Kemanusiaan (PBMSK) di Riverside Janda Baik, Bentong pada 21 Januari 2013 yang lalu.

Penganjuran kem buat kali kelima ini berjaya melatih pelajar meminati dan menggunakan bahasa Inggeris untuk meningkatkan penguasaan bahasa Inggeris terutamanya dalam berkomunikasi.

Menurut Guru Bahasa PBMSK, Nor Suhardiliana Sahar, Kelab Intellegentsia juga aktif menjalankan lain-lain program seperti "*Spell It Right UMP*", "*So You Think You Can Speak*" serta merancang menganjurkan program *Oh! My English* dan kuiz bahasa Inggeris.

"Selama tiga hari kem dijalankan, pelajar dikehendaki menggunakan bahasa Inggeris untuk bertutur dengan rakan sepasukan di sepanjang program berlangsung dan markah kumpulan akan ditolak sekiranya gagal

mematuhi syarat ini," katanya.

Beliau berkata, aktiviti yang dilakukan juga menarik dan berbentuk permainan dalam bahasa Inggeris yang mencabar minda dengan menekankan aspek pendengaran dan percakapan (*non-verbal and verbal*).

Pengarah program, Nor Fadhillah Mohd Mazalan berkata, kejayaan kem ini untuk mencapai objektif telah tercapai dan dapat memberi motivasi dan keyakinan kepada peserta.

Selain itu, peserta banyak menimba ilmu dengan cara yang menyeronokkan sepanjang kem.

Pelajar yang mengikuti pengajian Kejuruteraan Kimia di tahun kedua, Siti Hajar Abdul Hamid yang dilantik sebagai fasilitator berkata, kem ini berjaya mengetengahkan pembelajaran yang lebih efektif kepada pelajar agar dapat digunakan walaupun di luar kelas.

Sementara itu, rakannya pelajar tahun tiga Falkulti Kejuruteraan Mekanikal (FKM), Nur Naqiaie Yuddin Nor Adzhar yang menjadi fasilitator buat kali pertamanya berkata, aktiviti-aktiviti yang dijalankan ini



dapat membuatkan pelajar seronok untuk mempelajari bahasa Inggeris.

Malahan katanya, bukan sahaja sekadar menjadi fasilitator dalam memastikan program berjalan lancar, malah di kalangan fasilitator juga berpeluang menggunakan bahasa Inggeris untuk berkomunikasi dengan lebih yakin.

